

This is not registered version of Total Doc Converter

Hotam Xurramovni yuzdan bilinar-bilinmas kulgi yoyilibdi. U ustki labini bir-ikki bor so'rib, debdi:

- Kecha Hurramovni Egam Rabiyeovich chaqiribdilar. "Siz shu sohaning pirlaridansiz - suyagingiz shu yerda qotgan. Xo'p desayiz, sizni mukofotga tavsiya etmoqchimiz. Bir-ikkita joy bilan gaplashdim, ular ham sizni ma'qullashdi, - debdi Egam Rabiyeovich uch qavatli baqbaqasini qashib. - Hozir shundoq chiqing-da, adlkadr Hamroxonga uchrashing, u sizga anketa to'ldiradi... Yana bir gap - paka buni birov bilmasin..."

Hotam Xurramov shoshib qolibdi.

- Mani hurmat qilibsiz, sizni Xudo hurmat qilsin. "Paka" deyapsiz, keyin og'izga tushsa sizga gap tegib yurmasin. Yaxshisi, mestkom raisi Qodirqulni...

- Qodirqul! Qodirqulingizni qo'ying, yaqinda Chimyonda o'ynab keldi. U hali yosh, mukofot olishga ulguradi. Gal hozircha sizniki!

- Bug'oltirimiz Umriyaxon-chi? Sakkizta bolasi bor,ishga mendan bir yil oldin kegan...

- Qanaqasiz o'zi, Hotam aka! Birov beraman desa, noz qilasiz-a! Nima, mas'uliyatidan qo'rqayapsizmi yo?..

Xullas, Egam Rabiyeovich Xurramovning ko'nglini tog' qilib, kadrlar bo'limiga chiqarib yuboribdi. U lapanglagancha Hamroxonning oldiga borsa, Hamroxon tog'day ko'ngilni "talqon" qilibdi-qo'yibdi. O'rtalaridan nima gap o'tgan, hech kim bilmaydi.

Hamroxon jig'ibiyron - xonama-xona kirib, nuqul: "Men ortiqcha savol berganim yo'q. Anketada borini so'radim, xolos. Otam tengi odamning gapiga qaranglar - men ersirab qolgan emishman!" deya javrayotganmish. Hamma hayron: Hotam Xurramov Hamroxonga nega bunday degan?..

Bu jumboq Egam Rabiyeovichning "sir"ini fosh qildi. Ya'ni Xurramovning mukofotga tavsiya etilayotganini ko'pchilik bildi.

Tabiiyki, gap Egam Rabiyeovichning ham qulog'iga borib yetdi va tushdan keyin Xurramov bilan Hamroxonni xonasiga chaqiribdi.

- Men sizga nima degan edim? - Boshliq birinchi bo'lib Xurramovni zug'umga olgan. - Paka hech kim bilmasin, degandim-ku? -

Xurramov boshini qimirlatib qo'yibdi. - Boshqalar nima deb o'ylaydi endi! Boshliq bizlardan gap yashirarkan, deyishmaydimi? -

So'ng Hamroxonni o'rnidan turg'izibdi. - Ha, singlim, sizga nima dard tegdi? Og'zingizga mahkam edingiz-ku!

- Men haliyom og'zimga mahkam, - debdi Hamroxon to'lib turgan o'pkasini bo'shatib. - Kap-katta odam menga tuhmat qilib o'tiribdilar.

- Qanaqa tuhmat?

- Men... haligi... ersiragan emishman.

- Nima, nima! - Egam Rabiyeovich o'rnidan sakrab turibdi. - Kim o'ylab topdi buni? Qaysi bir xotinbozdan chiqdi bu gap?

- Mana bu kishidan, - Hamroxon boshi bilan Hotam Xurramovni ko'rsatibdi.

- Bu nima gap! - Egam Rabiyeovich boshini changallabdi. - Men sizni madaniyatli, xotin-qizlarni hurmat qiladigan olijanob kishi deb yursam, hali bunaqa salbiy xususiyatlaringiz ham bormidi? Singlimizni nega bunaqa deb haqorat qildingiz? Ersiraganini qayoqdan bilasiz?

- Gap birinchi undan chiqdi, - debdi hali birorta ham savolga javob bermagan Xurramov Hamroxonni ko'rsatib. - Menga "erkakmisiz?" dedi. Hamiyatimga tegdi-da! "Erkak, erkak emasligimni ko'rmayapsanmi! Ersirab qolgan, banda!" dedim jahll ustida. Sizgayam birov lo'p etib shunday desin qani, nima deyarkansiz!

Hotam Xurramovning bu gapi "meni o'rnimga o'zingni qo'yib ko'r-chi", degan ma'no beradi-da. Shu bois Egam Rabiyeovich noqulay ahvolda qolibdi.

- Shu rostmi? Shu gap sizning og'zingizdan chiqdimi, Hamroxon?..

- Rost, - debdi Hamroxon yer chizib. - Lekin, men...

- O'zizdan o'tkanakan-da, singlim, - Egam Rabiyeovich tik turgani esiga tushib, qayta o'tiribdi. - Erkak kishiga unaqa demaydilar, singlim. Tem bole, ayol to'yes, hali qiz bolasiz... Har qanday erkak yomon xayolga borishi mumkin-da... Siz bo'sayiz, Hotam akani benovat qilib o'tiribsiz...

Hamroxonning xo'rliqi kelib tursa-da, ko'zyoshiga zo'r berishdan foyda yo'qligini anglab yetibdi.

- Egam aka, men bu gapni ichimdan chiqarib aytmadim, - debdi Hamroxon dadil-dadil. - Anketada shunaqa savol bor. Shunga asoslanib...

Egam Rabiyeovichning yuziga bilinar-bilinmas kulgi yoyilibdi. U ustki labini bir-ikki bor so'rib, debdi:

- Anketada shunaqa savol bor ekanmi?

- Bor! - debdi Hamroxon yutib. - "Jinsi: erkak, ayol", degan joy bor-da, Egam aka. Men ichimdan to'qiganim yo'q-ku!

- Gap buyoqda deng, - debdi Egam Rabiyeovich kulib yubormaslik uchun og'zining ikki chetini bosh va ko'rsatkich barmog'i bilan tutib. - Savolni boshqacha qo'yibsiz-da, sizam. Kimsiz, desa... E, bunisiyam xunuk eshitarlarkan. O'zi erkaklardan kimligini so'rash shartmikan! Erkak - erkak-da! Shu joyini o'zingiz to'ldirib qo'yibsiz-da, Hamroxon. Hotam akaning erkakligini bilasiz-ku, yuz-ko'zi aytib turibdi.

Egam Rabiyeovich ikkalasini murosaga keltirib chiqarib yuboribdi.

Aytgancha, mojaroga sabab bo'lgan "Anketa" to'ldirilib tegishli joyga yuborilgan. Hozircha natijasi noma'lum bo'lsa-da, lekin bir gap ma'lum: mukofotni olgan kuni "erkakchasiga yuvamiz" deyaptilar Hotam Xurramov.